



官
六合叢談
刪定本
四

ル 1
2999
4



門 几 1
號 2999
卷 4

卷之四

目錄 咸豐丁巳四月朔日

地理 洲島論

西學說 古羅馬風俗禮教 羅馬詩人略說

用強說

泰西近事略

南洋近事

雜紀

昭和十六年三月五日
石澤介吉氏 贈寄

飯田
石澤

地理 州島論

慕維廉

已論地分東西兩半球東半球有亞西亞歐羅巴阿非利
 加三州西半球有南北亞墨利加二州其外又有大洋群
 島星布碁列南北寒帶內見有陸地形跡然猶未能悉其
 為島為州也今以所知之地計其里數則東半球總得約
 二億七千萬方里歐羅巴計三千二百十五萬方里亞西
 亞計一億三千九百五十五萬方里阿非利加計九千八
 百三十萬方里西半球總得一億二千二百三十萬方里
 北亞墨利加計六千三百四十萬方里南亞墨利加計五
 千八百九十萬方里大洋群島總得三千九百三十四萬

古今叢書

方里大地形勢各處不同有略高于海面者有嶺高于平地約十五里者藪澤沙漠平原曠野各各不同熱帶之內生物繁盛嚴寒之區冰雪常存更以各地形勢計之歐羅巴大半在北溫帶內岡嶺原野洋海廻環氣候適宜東接亞西亞此處地勢相同動植之物每易相雜亞西亞在溫熱寒三帶之中大于歐羅巴五倍地勢互異峻嶺參天高原平野沙漠居多肥饒之區大河灌溉嚴寒之處冰雪不消炎燄之地酷日薰蒸山谷清美惡草涂疫地分五土曰中亞西亞崇山綿亘高原寬廣深谷毘連北亞西亞在阿爾泰山以北地勢甚低大河中貫氣候凝寒不毛之土居

民鮮少東亞西亞地卑下資大河灌溉岡陵聯絡南亞西亞總括五印度恒河之外稱佳壤焉岡巒斷續地氣熱而不酷以陰雨為冬每年一次久旱亦必荒蕪西亞西亞自印度河西至裏海之北皆高原沙漠間有鹽湖河道鮮少地多酷暑阿非利加四面皆海有微壤接亞西亞長約二百里彼土形勢難詳惟沿海一帶與北方沙漠略能考察今有西士流寓于彼考其地勢東接亞西亞北距歐羅巴其動植諸物大略相同亞墨利加之中有微壤名巴那馬以聯南北長僅五十里皆高原岡嶺故分為南亞墨利加北亞墨利加南亞墨利加在溫熱二帶之中峯巒壁立平

野延袤西方濱海酷暑為大山之麓廣百五十里或三百里東即安的斯山綿亘南北東北二方多高原曠野疇勒諾哥河濱地勢低淤亞馬孫河濱高原坦闊拉不拉他河濱平野袤延草木異于他處北亞墨利加極北處不能細詳在北溫帶者地勢平坦河湖甚大南有熱帶北有寒帶故動植物有大不同者西北近亞西亞以白令峽為界濶僅百里時或冰凝故亞西亞毛羽諸族易以遷徙也大洋群島各處皆有或群島羅列或一島孤峙或石突起或沙堆漲或如珊瑚樹或聯絡于海面或海底山脊與陸地相接或大山或地震湧起以成新造之洲或陸地下沈

餘跡東半球之最著者為英日本非里比納之群島印度洋之群島澳大利之群島西半球為西印度群島不里尼西群島島之最大者曰澳大利方里者約三千萬婆羅洲方里者二百二十五萬馬達加斯加方里者二百二十萬巴不亞未詳蘇門答臘方里者百有十萬長崎方里者九十四萬英方里者七十一萬新森拉未詳新著島方里者四十九萬古白方里者三十七萬水洲方里者八萬五千以上海島或本接大洲土潰而離或古昔陸地之餘設島與相近大洲海濱體質相同則此島為大洲一段下沈之餘或已沈復起所有動植諸物皆無異也若不同則此

島為古昔陸地之遺，或為新地，如澳大利是也。或火山噴起，此地球古今變遷，可證海底與地面之高卑，平直略似。島自海底突起，若山嶺之突起于地面也。

地球陸地有洲有島，其支幹分派與動植諸物有關繫焉。設東半球地殼盡凸起，則英國與歐羅巴成為一土，亞西亞阿非利加亦成一土，而恒河低淤之地成平野，拉加底維斯馬地維斯群島成一大島，中國東洋成平野，使地殼低下，則瑞顛、噠那、威諸國與歐羅巴不相聯，而荷蘭、比利時、中歐羅巴皆為洋海，亞西亞阿非利加分為二土，亞喇伯埃及北阿非利加盡為地中海，如此東半球之陸地變

遷不一。西半球之地勢高卑不同，大洋群島亦皆互異矣。若果易其方向，變其位置，其關繫豈淺鮮哉？設以南亞墨利加方向東西，或阿非利加大河中貫，則其動植諸物必大不同於今之種類也。統覽地球形勢，互異氣候不齊，使天下形勢氣候皆如一，則其害尤大。蓋人之形體風俗，各隨氣候形勢而異焉。設陸地皆在北寒帶，則人皆如厄斯幾毛、拉比蘭之民，皆在南寒帶，則皆如府伊勾之民，盡為野番無識矣。設皆在熱帶，則人多氣秉柔弱，知識昏濁矣。而當今諸陸地在溫帶者居多，如中華、印度、波斯、迦勒底、叙利亞、埃及、希臘、羅馬、法蘭西、英薩索尼，皆歷代禮義相

傳聲名文物之邦是上帝位置洲島非泛然也

西學說 古羅馬風俗禮教

艾約瑟

羅人自幼教以讀書當有王及無王時齊家之道甚嚴百姓日用有常勤于職業家各有主督課子弟變化氣質學問日新為母者不忍以其兒托于僕媪之手以教子為已任使之去惡從善習於言語嫺于禮儀羅俗有辭令可觀者得推擇至顯僚童稚先習對簿折辯之事學武備兵械至十七歲為成人乃服裳衣就外傳教以辭令率之往觀獄訟聽斷之是非議論朝廷政事之得失凡其人言辭之

敏給者多登于載籍傳為佳話焉

羅馬詩人略說

羅馬立國之初並無書籍及迦大其之戰希臘人降即學希人之學泰西各國學問之初先習歌詩度曲戰陣樂府禱祀祝讚與田家風謠等事周顯王時曷都利亞國羅馬北地有善歌者來羅以其國之歌謠教羅人效之易以羅語秦昭襄王時以希臘戲劇本作為羅劇羅人作劇之祖曰恩紐斯最有名嗣有伯勞都斯者所演文劇其本今泰西書院中猶有誦之者又有該幾留斯者所作更勝于伯勞都斯昔基改羅云羅之劇本該幾留斯最妙惜失傳矣傳者

其徒德論低烏斯所作亦較伯勞都斯為雅做希之舊也
又有演武劇者其本不傳傳賽乃加所作恐贗本也羅之
文學最盛于基改羅時加多所作述國政及農事國政詩
失傳農事猶有存者又一人曰伐羅人品博雅究心農政
及他學術作史記者曰薩盧斯底與希臘史體例略異不
特紀事兼之窮理西人史中窮理之學自此始也後來作
史亦多做之所載皆國家經濟有用之學惟文法頗奇拙
詰曲聱牙該撒學問優通文法精鍊而少窮理之思蓋欲
記載得真不願以己學見長又有利末烏斯著史數十卷
甲于羅馬史家今所存者為三分之一檢出宜載之事登

之于史識見特高文亦美備論理學與國家政度無不一
一精確又越百年羅馬文風略衰時有答吉都斯依薩盧
史法深究當時諸事本末以褒善貶惡道人之情性其文
理古奧特未清晰然詠疆場事能感動人心同於目睹有
盧各類的烏斯者以天地萬物之理并性理及宇宙初闢
源流作長歌詩十二卷有數處模倣詩體甚為合法間亦
平安因性理之言難成篇什也又有一人與盧同時曰迦
都盧斯著短詩數首今尚存于世厥後名流並起詩品超
卓亞古士督為帝時微爾其留推臘丁詩中之聖比中國
之李杜焉所傳者牧唱十首農詩四卷武詩十二卷其性

情愛雅惡俗文理精緻一無語病和拉低烏斯為短詩百數首能令人笑能令人駭譏時論世暗含諷刺談笑出之有如微那爾所作之詩深刺風俗第文法不及和拉低而思致較深責惡更為徑直又有阿微地烏斯所著之詩體格變化如蛟龍神物捉摸不定能描繪風景妙體人性惜其詩流蕩忘返是其所短又低部盧斯之詩尚雅音而黜邪思馬爾低阿利斯之詩句雖簡括意味深長其後羅馬詩人蔚興然人才之盛遠不逮前政事與文風遂一敗而不可復振矣

用強說

韓應陞

萬物莫不喜強而惡弱然而用強者正其所以自弱也天生之物強在其中弱在其始終人為之物強處其始弱處其終物之有質者莫不有終物之所終即強之所盡刀之利也以其新發於剛之時為最由是而漸鈍至不能割而止弓之重也以其始成之時為最由是而漸敝至不能發而止刀之鈍之積也由割之數積也弓之敝之積也由發之數積也同時而為二刀一以割一以藏也久之而一鈍一利其鈍者必其割者也其利者必其藏者也同時而為二弓一以發一以藏也久之而一敝一好其敝者必其發

者也其好者必其藏者也行百里者不息則不能更行負百鈞者不息則不能更負日久視則眩耳久聽則聾身久勞則病也天下之物莫不有美也美在其中不洩則不亡用其強者乃所以洩其強也強安得存世之輕用強者其亦知所警已哉

泰西近事述略

正月十有六日郵寄信札始離英京倫敦繼抵印度於二月六日麻打拉陸驛船從孟買啓行二月十七日離加利二十三日離檳榔島於三月八日福摩沙驛船離香港十

三日抵滬所遞近事如左

正月九日英闕議院爵者與紳士咸集國主駕未親臨遣大臣至院宣讀詔命所論列邦之事略云朕嘉爾眾群集于此以商國事曩者在巴黎斯列邦公使所成和約有未明替今已賅備無疵可為定論舊歲七月間瑞士國牛沙德部有民欲起為亂將納普魯士王以統其地是以普瑞交爭致啓釁端恐歐洲列邦因之興兵構禍然今英法二國為之排解勸其輯睦可冀昇平自必無事前于公使會集法京之時議列邦治亂事於後英法二國皆修書致那不勒王勸王留心政事一秉至公則兵戎可弭而於歐洲

不復見兵革之事，那王覆書詞意倨慢無禮，因此英法各詔公使歸國。前於中亞墨利加議不僉同，將生嫌隙。今與合衆及閩都拉斯二國籌商，或可釋憾，不至乖和。舊歲本國與暹羅新締和議，得以通商，惜乎波斯敗盟，所行不公，與之攻戰，非出得已。本國已屢勸其主，勿渝曩約。食前言，乃彼弗聽，攻陷希辣。茲者本國已遣兵往攻，從孟買順流而下，取家臘島，下婆時爾城。我兵執銳摧堅，強武可用，朕甚悅焉。至於中華，粵官背約，啓衅致有紛爭，又不肯自任過失，此不得不用武。但據香港馳奏之言，知本國武臣善待華民，未嘗力攻，故望京師歸罪粵官，責償所失，自可仍

守舊約，和悅如初，是所願也。

波斯遣公使非羅汗，抵法國儀衛甚盛，侍從如雲。其中最
大者有參贊正副二員，譯官大小二員，博士正副二員，繕
寫大小二員，習醫者二員，明化學者一員，其餘更有二十
六人。于丙辰十二月二十九日，見法帝於宮中，面呈國書。
後至英國公使署中相見，籌商國事。人思二國必將議和，
不興干戈矣。

瑞士遣公使克尼，詣法京巴黎斯，論牛沙德事。其言甚剛，
無修睦鄰封之意。普國意欲議和，而恐瑞士待之不善，所
索太奢。故建議於後，將立公使以主其事。或由英，或由法

尚未定所遣也近聞瑞士已出所囚之人於獄

俄帝太子君士但丁於丙辰十二月十一日清晨離京都詣各弗諾普國哥甯堡繼至撒丁國尼西往覲太后其妃本與妹在哈諾威即將繼至尼西與太子相見焉太子于途易名曰羅馬諾夫水師提督護從行蹕者有將軍二又有內臣偕行○俄帝于其京設鍛冶房造鐵船廠建火輪器局雄壯宏大甲於歐洲列邦所製之物極為神速且事多機密外人罕有知者其工最為浩繁用大鐵錘十四皆以火輪機振能自運動以此錘造鐵師船火輪器皿巨礮工匠多用英人近時有一匠歸本國述其事如此○俄西

巴士多卜魯有信至云流民之歸籍者七千餘人在迦墨斯二千人當城破時焚燬廬屋三百所今已修葺完整民間房舍亦有新建者漸能復舊觀矣○北亞墨利加俄所屬之地會城曰新阿爾哈連近已添設戍兵因舊歲迦落施部侵其境也迦部民多獷野鄰近會城忽臨城下踰城而入至天主堂據而居之乃以兵圍攻兵皆血刃始驅之出現平息無事

土耳其議建火輪新路自多惱河以達黑海更有數路聯屬不斷至俄北境是路起於多惱河直抵海口依哪士皆於土國為要途凡歐洲列國自東至西此路甚為便捷苟

建路若成則為商賈往來必由之道自歐至叙利亞埃及印度運載貨物悉從此過路連俄境之格倫斯泰從倫敦抵埃及七日可至路長九百五十里其地土國皆當界之不取其值

丙辰十二月二十八日奧地利帝大赦罪人於威尼斯倫巴多出叛逆者于囹圄寘諸寬典概行赦宥前有訟獄之事皆置不問于是日在米蘭之民咸喜躍歡呼燃燈于室以相慶賀奧帝駕幸近邑鑿蹕所至北姓爭迎蓋因得脫于獄者人數衆多故感謝無既也奧帝親至衢市使民咸覲其面手携其小公主與衆觀瞻是夕帝偕后妃幸演劇

所登臺觀劇四周百姓齊呼萬歲宣片時詐如是者三演劇甫半帝遽歸宮一時觀劇之民大半護蹕而去直抵王宮而散後三日帝后乘車游覽馬軼不能止御者難施其技車幾覆民見之皆捷走相助急收其韁送至王宮后深謝之因其服事之勤也以此知上下皆和氣相孚矣奧帝思前有逃卒尚未歸籍欲赦其罪各詔返國

那不勒國有信至云國中士庶皆有悲憂愁慘之象演劇所已閉茶肆印書房書庫強半停止海關景况蕭索信局中亦闕無人致信皆自往投遞前有群眾官吏疑其將謀逆執五百人訊而得釋者僅百人而已○大主教于那都

天主堂誦經時突有神父持刀欲殺旁立者阻之乃發小鎗斃其命主教得乘間而逸神父往追甚急二人皆躓而神父為所獲主教受微傷○他處有信云那王同南亞墨利加拉巴拉他國結約因那國法峻刑苛囹圄充斥故將釋其罪遣至南亞之地以隙地畀使之自行耕植亦以從列國之所勸也每遣一犯則輸拉國銀有定數計那國所遣獄囚共六百七十二人中有三十四人罰在舊船中工作四百八十人罰在溷室供役二十四人罰在獄中作勞苦之役百人幽於一地不得擅往他處二十五人發往外邦不得歸國九人放于異地年滿釋歸復有四十七人

因印書譏論國事寘于獄中今無論罪之輕重概行宥之發往南方

撒丁王駕往尼西見俄太子即於正月三日返熱那夜半王離宮遄征民集於王前同聲頌美各執火炬導至城闈正月十二日西班牙遣新公使勃拉弗離馬德里詣英○近巴塞羅鄰山中有三十人各執器械民多見之疑是叛黨或係盜因見其曾劫人財也○斯丁于咸豐辛亥為連國屬地議院中用連國方言丙辰十二月二十四日人欲易以日耳曼語如前時為此辨論者殊多議尚未定惟簡數人籌商以折衷是事焉

瑞顛與那威二國詔大臣議練兵法議既定乃上於瑞顛王瑞國議于民百人中簡一人為兵共計陸兵之數得三萬五千餘兵亦如其數以備不虞藉供徵調更有水兵一萬八千那威亦千百中簡一計得陸兵一萬二千餘兵亦一萬二千水兵一萬二千陸兵中六之一為騎卒每隊益數人防守礮位百之一為建路修器之匠役

土耳其王許作電氣通標自埃及達紅海創始者曰極士盆乙卯國王許其興工從黑勒角至亞力山太經西阿羅底二島以此通標立其根後建東方通標會使自西至東之路聯屬不斷可由英而達印度英之印度貿易公局知

此標為郵遞要事故力贊其成極士盆之弟至埃及請埃王許通標經其國又與土立約曰凡遞信往返土國者土官必知其事毋許潛達從黑勒角至亞力山太之通標土王用以遞信至埃及每歲給銀一萬八千兩埃國亦樂助焉自沿海頸地蘇夷士至孟買之哥勒希由海底而過計從黑勒至亞力山太二年可成由紅海之路又三年可成所約如此然公會期于速竣其事思期年間電氣之線定可垂成矣

南洋近事

二月中檳榔島有華人為亂於是益邏察者五十二人令

民守望相助諭其安輯後亂者起殺三人傷者甚多迨火輪船離彼時已寧靜矣

婆羅洲之薩拉瓦有金窖掘金者多華民正月二十三日夜半有二百人至古鎮邑圍攻五處齊發欲執官吏殺之國主與二官從後戶逸踰溪入無來由小村匿焉署中一吏曰尼哥律為其所戕有大僚之妻扑幾死又辨金色之吏曰窀林敦亦被殺殊其首民間未為所擾明日叛黨遣大僚之妻至主教所并請主教及二人攝政皆弗之許越一日劫衙署中物置于舟沿河而遁國主避至薩馬拉罕出示諭無來由民咸集于薩捫讓以扞禦之門時擊死華

民五人本土邏卒數人為華民所殺齧割其肉居古鎮之華民不入其黨安堵無事中有避亂之華民携其財貨率其妻孥眷屬共一百八人附火輪驛船遷于新嘉坡

雜紀

近倫敦醫會中群醫咸集有土諾者言新得一物可代麻藥人食之即遍體不覺痛用以動刀施割良便其名亞米林施醫院中已用二十次無害

